

Get-Together – Or cun il marmogn!

■ (cp) Dal 12 da fanadur fin ils 15 d'avust sa metta il project «Get-Together – Inscunter dals linguatgs» sin via per scuvrir la quadrilinguitad a moda frestga e nova. Per ina giada na stattan betg las differenzas pertutgant il foss da la rösti u auters foss en il center, mabain la tschertga da tratgs cuminaivels. Mintgin sa sa participar, tuttina sche per in di, in'emna u l'entir temp da viadi. La quadrilinguitad tutga tar la Svizra sco vatgas, chaschiel e tschigulatta. Igl è ina da las atgnadads che fa che la Svizra sa distingua d'austras naziuns. Ina Svizra senza ils quatter linguatgs naziunals tudestg, franzos, talian e rumantsch è bunamain nun-imaginabel ed era sin stgalim politic èn il mantegniment e la tgira da la plurilinguitad puspè stads in tema da discussiun brisant. Il project Get-Together sa metta sin via per perseguitar quest fenomen e per dar la pussaivladad a la populaziun d'exprimer sia opiniun.

L'idea davostiers è fitg simpla. Sin ina tura vegnan traversadas tuttas quatter regiuns linguisticas. Duas gruppas cumenzan a Chancy e Müstair, per s'entupar ils 8 d'avust ad Engelberg e suenter viandar ensemen a Berna, il cor da la Svizra politica. Là va il viadi a fin ils 15 d'avust cun ina gronda festa sin il plaz da la chasa federala.

Envidada d'accompagnar las gruppas plurilinguisticas è l'entira Svizra. «Highlights» dal viadi èn otg dis da project

durant ils quals ins survegn mintgamai in'invista en la cultura regiunala. Uschia vegnan, ensemen cun la populaziun, installadas stivas sin plazzas publicas ch'envidan ad in barat empernaivel. Bands e gruppas da saut u teater dal lieu vegnan a mussar lur talent ed ils mastergnants ed artists locals envidan da sa participar a lur activitads.

Ils participants furman er il project

L'organisaziun dal project va cun plaina forza. L'entira ruta è fixa, ils lieus da pernottaziun èn reservads, ils dis da project èn en planisaziun ed ils guides da las turas èn prontos da manar lur gruppa tras la Svizra.

Il sulet che mantga anc èn ils participants. Dapli glied da tuttas vegliadetgnas che sa participescha e pli variant vegn il barat. Il project less dar spazi per bleras ideas novas e creativas che mainan tar inscunters tranter glied da tuttas parts da la naziun e pussibiliteschan uschia in'invista en las austras regiuns linguisticas.

Ils organisaturs e las organisaturas giuvnas da tuttas parts da la terra lessan crear cun lur idea ina plattforma che pussibilitescha da scuntrar la quadrilinguitad da la Svizra uschè avert ed activ sco prest anc mai.

Els envidan a la stad la pli quadrilingua che la Svizra ha vesì insacura.

Ulteriuras infurmaziuns e l'annunzia chattais Vus sin la pagina da project: www.get-together.ch